

DEUTERONOMIO

Jawen unanmati janchaki

Israelin enabu ichapabu Egipto anua taxnibidanibu inun Mati Sinaí anuxun Diosun jatu uinmani unanbumawen taexun Moisin jatu unanmajaidakin jatu yusinkubainikiaki, jenetima wakinan. Diosun yunuti inun jawen nemati Moisin ana jatu yusinkubainkin Moisés anibui ma mawa kemaxun Josué jau jatun xanen ibu ikunkainxanun jatu katuxunikiaki. Jawen yusinti jancha Moisin jatu ana kenemakubainima Moisés mawaimaken jakidi kenedianibukiaki.

Jehován yunuima jau chibankin akubainxanunbun Moisin jakidi jatu jancha yusinikiaki, na janchadan

1 ¹ Mae betsa Suf besuudi Jene Jordán ukedi badi juaikidi mae betsa betsapa Parán inun, Tófel inun, Labán inun, Haserot inun, Dizahab namakis tsua janu jiweabumanu jawen kena Arabá anuxun jatun tadi jiwe puntebaunabu anuxun Israelin enabu dasibibun ninkaibun eska jancha Moisin jatu yuinikiaki. ² Mati Horeb jawen kena betsa Mati Sinaí anua bui Seír baiwen 11 día kai mati tibi dunkeatanbaini mae betsa Cadés-barnea anu jikinibuki. ³⁻⁴ Jene Jordán kexa betsaudixun Moisin jatu yunua Amorreo nawabu xanen ibujaida Sihón, mae Hesbón anu jiwea jawen detenamenikabube Israelin enabu jatu maemashinabu Moisin ana jatu yunua mai pakea kesuakea Edrei anu Basán nawabu xanen ibujaida Og Astarot anu jiwexun jatu yunuaya Israelin enabun Og inun jawen detenamenikabu jatu maemakin keyushinabu Egipto anua taxnibidanibu ma 40 año kaya 11 uxetian xaba ja dukun taeaya ja nawabu jatu yamawashinabu jabatiandi Moisin jaska dasibi Jehován yunuima jau chibankin akubainxanunbun Moisin jakidi jatu jancha yusinikiaki. ⁵ Jene Jordán kexa betsaudia jadidia badi juaikidixun Moab nawabu mae ewapa panpawan anuxun yusinti jancha Moisin jatu yusin taewakin yuikin:

⁶ “Mati Horeb anuxun nukun mekenika Dios Jehován nuku yuikin: ‘Matudan, na mati dapi man janus jiwei chaipaki. ⁷ Natian nenua benibainkatsi matun mabu pewatan bukanwen, ja Amorreo nawabu janu

jiwebaunabu inun jatu dapi dasibi jiwebaunabu mati matipa anudan. Jaska inun buidan, Arabá anu mapanpa inun kepanpa inun, mai tsusin Négueb anu inun, ianenwan kexa kepanpa Canaán nawabun mae anu inun, Líbano anu inun, ana nortekidi chajjaida jene ewapa Éufrates anudi ja mai dasibi anu jadi bukanwen. ⁸Ja mai jidabi dasibi Abraham inun, Isaac inun, Jacob inun, matunabu pakubainxanaibudi matun xenipabu ea Jehován inankatsi en jatu yubani anu bukin janu jiweabu mebinkin putakin jatu yamawatan ja mai jidabi ibuwakubainxankanwen', akin Jehován nuku yuini en matu shinanmai", akin Moisin jatu yuinikiaki.

**Israelin enabun jau Dios ninkatan chibankubainunbun
Moisin jatu yusinikiaki, na janchadan**

4 ¹Chipu Moisin jatu ana yuikin:
—Jhová matun xenipabun mekenika Diosun mai pepa matu ibuwamaxanai anu jadi jikikin ibuwatan man janu jiwexun chibankin jawen yunuti inun jawen nemati yusini natian en matu ana yusiain ninkatan jakimama aki jawen jiwekubainxankanwen, chintuanmadan. ²Jaska en matu yusiainan, ana betsa wakin chichikin ewa wama inun jancha betsa tede akama jaska matun mekenika Jehován yunua besti chibain pejaidaxunkubainxankanwen. ³Baal-peor mae anuxun en jancha ninkama matunabu betsa betsapabun jatun kenwanti dami mishkiki danti iki beti ixun kenwainmabuwen taexun Jehován jatu kupikin tenankin keyuai matu dasibibun jaska man uinmaki. ⁴Jakia matun mekenika Dios Jhová dasibibun jawen jancha man chibainbudan, natian man jiweyuabuki. ⁵Jaskaken matunan, uindakanwen. Janu man jiwexanai anuxun jawen jancha man chibankubainxanunbun Jehován jancha kushipa inun jawen yunuti inun jawen nemati jancha ea yuikubidana en matu yusindiakubidanimaki. ⁶Jaskawen taexun Jehován jancha ninkakin man akubainaibu tsuabunda matu uinkin man unanepabu inun man ninkanikabu matu uinkin shinanxankanikiki. Jehován jancha man chibanmiskidi tsuabunda ninkakin yuikubainkin: “Ja yudabu ichapabu patapama yusin ninkanikabu inun unanepabuki”, akin matukidi yuitidubuki. ⁷Jakia nawabun jatun kenwanti yushibu ichapa jayabun kenwankin yukabiabu jawa jatu ninkatan kematidumaki. Jakia nukubudan, nukun mekenika Dios Jhová nun jaya jawenchains nun yukai tibi nuku ninkatan kemakubainikiki. ⁸Na yunuti jancha inun jawen nemati jancha pepa natian en matu inanxu keska, ¿jadatu yudabu jatun beya pepa jayabumen? Jaska jayabumaki. ⁹Jakia 40 año dasibi man uinkubidanshina man jakimataskayamaxanunbun uindajaidakubainxankanwen, shinan jeneamadan. Jaska man uinkubidanai shinain jiwekubainkin na jabias jancha inun jawada man

uinkubidanai matun bakebu inun matun bababu xabakabi jatu yusinkin tapinmakubainxankanwen— iwanan,

**Mati Horeb anuxun Dios janchani Moisin ana
jatu shinanmanikiaki, na janchadan**

¹⁰jatu ana yuikin:

“Jadia nun juima anu Mati Horeb dapi Jehová bebun matun ibubube man mapubaunibu en shinaiin. Jadixun Jehován ea yuikin: ‘Israelin enabu ea bebun ea jatu ichawaxunwen, en jancha en jatu yusiain ninkakin tapintan jau xaba tibi eki mesekin ea kenwandiakubainxanunbunan. Jabiaskadi wakin jatun bakebu jatu yusinkin jau jatu tapinmadiapakexanunbunan’, ea wa ¹¹en matu ichawaken mati tenanman matun ibubube man bea mapuabun mati anu chi jede ji ji ikaunaya chi kuin nai anu inakain meshu dunuken ¹²janua Jehová chi jede namakis anua janchaya jawen jui ninkakin jawa dami man uianma inibuki. ¹³Jabiatiandi jawen yubati jancha matun ibubu yuitan chipu mati anuxun jawen 10 yunuti inun jawen nemati jancha mestenepa mesejaida mishki sapa dabeki Jehován kenea jau unankin man tapintan akubainxanunbun matu yununiki. ¹⁴Janu mai pakea betsa jatu mebinkin ibuwatan jadixun jawen jancha chibain man ikubainxanunbun jawen yunuti inun jawen nemati jancha ea matu yusinmakubainkatsi bebunkidi Jehován ea yununiki”, iwanan,

**Yuda betsabun dami betsa betsapa kenwanmisbu keska
wakin jau Israelin enabun kenwanyamaxanunbun
jatu nemanikiaki, na janchadan**

¹⁵⁻¹⁸Moisin ana jatu yuikin:

“Mati Horeb anua chi jede namakis Jehová nixun matun ibubuya matu jancha wai jawen jui besti man ninkaniki, jawa dami yushin keska uianmadan. Jaskawen taexun jaki meseti wakin matunan, jawa dami betsa wataskayamaxankanwen. Uindajaidakubainxankanwen. Dami wakin juni itsa inun, ainbu itsa wakin inun, yuinaka itsa inun, peiyabu itsa inun, nutawen mapumisbu itsa inun, baka itsa wakin jaska taska dami wai chakabuyamaxankanwen. ¹⁹Ja dikabi naiudi uinkin badi inun uxe inun bishi inun bishi kauani chaxakainai bechitan jaki mesei ‘Jabaa!’ iki datekin jaska kenwanyamakubainxankanwen. Yudabu dasibi medabewakin jawada shadabu nai anua uintidubu Jehován jatu damiwaxuniki. ²⁰Diosun Egipto anua matu mebikinankidankin matu paxawakinan, jawena wabidankin matu iweniki. Na jabiatian man jawenabuki. ²¹Nun jawenabu kayabilia matuwen taexun en kaneaya Jehová eki sinatakin ea yuikin: ‘Jene Jordán min puketiduma inun mai pepa en jatu ibuwxamaxanai anu min jikitudumaki’, ea waniwen taea ²²na

jabia mae anua bestikiaki en mawaxanaii, Jene Jordán pukebainamadan. Jakia matubunan, pukebain ja mai pepajaida man ibuwxanaii.

23-24 Jakia matun mekenika Dios Jehová yaushinikatun chiwen dasibi kuamis keska matuki sinatatuwen taexun jaska matun mekenika Dios Jehován matu yubani jawen jancha jakimama inun jabiaskadi dami betsa betsapa ja dami watima matu nemani jabu tibi jakimama uindakubainxankanwen.

25 Mai pepa anu jikinixun bake pawai inun baba pawai ja mai anua anibui jakimakubainkin ja kenwanti dami betsa betsapa shinankin man axanimenkain. Jaska wakin matun mekenika Jehová bebunxun chakabu tibi wakubainkin man sinatamatidubuki. 26 Eskawen shinanti xabakabi en matu waii. Nai inun mai jabu chanitidubu keska wakin en matu unanti wamai. Na en matu jancha wai danankin man chakabuwakin Jehová sinatamai jaudi man kaxanai anua man debui keyuxanaii. Jadi man jiwei chaipama itiduki, yamai keyuidan. 27 Man chakabuwai matu kupikin nawa betsa betsapa anu sa akin Jehován matu ubisitawaxanikiki. Matu jaska wa jatidi eskadabes jatun mae anu man jiwebaunxankanaii. 28 Nawa betsa betsapabu anuxun jadixun yushin junibun jatun mekenen dami wakin ji inun mishki dami wamisbu ja damidan, uintidubuma inun, ninkatidubuma, inun pitidubuma inun, juinsinatidubumabiaken nawabun beya chibankin man jatubetan kenwanxanaii. 29 Jadixun atimas yushin dami danankin matun mekenika Dios Jehová jakimatan dananbianixun ana benakin matun yushin jidabiwen inun matun juinti jidabiwen shinain man ana jaki nukutiduki. 30 Man nuitapai inun man bika teneai uinkin atimas shinan betsa watan ana chintunkidan jaska Jehován matun ibubu yusini man ana ninkakin akubaintiduki. 31 Dateyamakanwen. Matun mekenika Dios Jehová nuikipajaidatun matu putama inun matu yamawama ixanikiki. Jaska matun xenipabu yubanixun jakimama matu ana mekekin jeneama ikunkainxanikiki.

32 Shinankanwen. Unu jiwei taenibutian inun jadi man jiwei taenitian ikubidanshinabudan, Diosun mai jidabi dami wakin juni wani anua mai nati ikin tsuabuda man jatu yukatiduki. Na jaska en matu yui ai keska nukun Jehová Diosun kushipa keska betsabun unanibumenkain. Uindiakanimenkainan, na jaska nun uinshina keskadan. 33 ¿Chi jede pueai medanua Dios janchai nawa xukua betsan ninkatan debuama inibu jayamen, jaska man ninkani keskadan, chi medanua janchaidan? 34 Jaska matun mekenika Dios Jehován matun ibubu katuxun abidani keska nawa betsabudan, ¿tsua jaska keska jayabumen? Eska tibi akinan, matun ibubu katuxun jawen unanti ichapa inun, jawen unanmati dami ichapa inun, dami itimaska betsa betsapa wakin jawen kushipawen jatu datemakin jatu detenamemakin Egipto anua Jehován matunabu abidani keska jabias man uini keska wakin mekenika yushin betsan, ¿atidumen? Jaska

keska jayamajaidaki. ³⁵Matun mekenika yushin pepa chanima kayabi Jehová Dioski. Tsuan Dios binua ja keska betsa jayama matu unanmaniki, jaska matu shinanmakinan. ³⁶Nai anuxun jawen juiwen matu jancha wakin man kaneaibu matu pewakubidaniki. Janua mai anuxundi jawen kushipa chi jede medanua Jehován jancha taxnai man ninkakubidaniki. ³⁷Matun xenipabu bechipai jatuwen nuikunkidaniwen taexun matunabudi pakubainaibu katutan jawen kushipa mentsisipajaidawen mebinanankin Egipto anua Jehován matu taxnimabidaniki. ³⁸Janua mai pepa jatu mebinmakin matun bedubi nawa xukua tibi matu nichinxunkin jabu midima matu binuan kushipajaidabiabun jatun mae betsa betsapa anua Jehován matu jatu putaxunkubidankin dama keyuikiki. Matu jaska waxunaya jatun maiwan inun jatun mae tibi man mebinkubainxanaii, ibuwakinan, natian matu axuain man uiain keskadan. ³⁹Jaskawen taexun matun shinanwen tsuma pewatan jakimayamakanwen, mistu pewakinan. Matun mekenika Dios Jehovádan, nai inun mai jidabi jawenaski. Mekenika ja keska Yushin Pepa betsan binuan tsua jayamajaidaki. ⁴⁰Jaska natian en matu yunuai keska jawen yunuti inun jawen nemati jancha Jehován matu yunuima akin chibankubainxankanwen. Man jaska waibun maiwan ibuwamakin Jehován matu inain anu matu inun matunabu pakubaini badi ichapa janus jiwepakexankanikiki”, jatu wanikiaki.

**Nukun mekenika Dios Jehová bechipaikin nukun
yuda jidabiwen atikiaki, na janchadan**

6 ⁴Chipu Moisin ana jatu yusinkubainkin yuikin:
“Israelin enabuun, matu yuinun ea ninkakanwen. Nukun mekenika Dios Jehovádan, bestichaiki, jatun kenwanti dami betsa betsapa keskamadan.

⁵Jaskaken matun mekenika Dios Jehová bechipaikin matun juinti dasibiwen inun matun jiwea dasibiwen inun matun kushipa dasibiwen duawakubainxankanwen, jeneamadan.

⁶Na jaska dasibi en matu yuixu matun shinan medan netantan jakimayamakubainkanwen. ⁷Ja dikabi na jaska tibi en matu yusinxu jaska tibi jakidi janchakin matun bakebu yusinkubainxankanwen, matun jiwetanxun inun, bai namakixun inun, uxaitian inun, man besteaintianan. ⁸Na yunuti jancha kenexun jakimatimakin bichi bau pishta watan nexatan matun mepitiki inun matun betunkuki nexetan jaya mapukubainxankanwen. ⁹Ja dikabi matun jiwe beputi istabin dabeki jabias na yunuti jancha kenekubainxankanwen. Ja inun, matun mae kenekauana janu jikimisbu xui beputi anu jabiaskadi wakin kenediakubainxankanwen”, itan,

**Jehová ninka pewatan jau jaki besti chiti ixanunbun Israelin enabu
Moisin jatu nemakin yusinchakayamanikiaki, na janchadan**

¹⁰“Matun mekenika Jehován matun xenipabu Abraham inun Isaac inun Jacob mai pakea yubani anu ma matu jikimai kaikiki. Mae ewapa jawendua shadabu anu dayakin man beniama ini nawabun ayamabu anu Jehován matu ma ibuwamai kaikiki. ¹¹Jiwe pepa mabu mata jaya jawa man janu aduama inibu inun, unpax banakin man pukianma idiani inun, uva bai waxun man banama idiani inun, miban ji olivo ichapa man banama idiani man ibuwxanaii, ja mae anuxun bimi pikin yaniwai pepeidan. ¹²Egipto anuxun matun ibubu dayadu esclavo wanixun jatu ichakawaibu jawen kushipawen Jehován jatu mebikinantan iwekubidanixun mai pepa anu ma matu jikimadan, jaska tibi bestikidi shinankin nukun mekenikaki pechitan jakimayamakubainxankanwen. ¹³Jaska shinain Jehováki mesekin kenwain ja besti dayaxuni pexunkubainxankanwen. Tsuabuda man yubakakatsis ikaidan: ‘En mia padanmaki’, iwanan, Jehován kena bestiwen xabakabi yubakakubainxankanwen. ¹⁴⁻¹⁵Matun mekenika Jehová Dios matube jiweadan, yaushinanki, jawa chakabu jusia uinkatsi ikama pepa besti matu uinun ikadan. Jakia man kanekubainaya jawaida matuki sinatakin Jehován matu yamawatiduki. Jaskawen taexun matu dapi jiwebaunxanaibudan, jabun yushibubu tibi kenwanmisbu jayaki. Jatu chibankin jatubetan kenwanyamaxankanwen”, jatu anikiaki.

**Jene puketan mae bestichai anuxun Jehová
kenwanxanaibukidi jatu yuinibukiaki, na janchadan**

12 ¹Israelin enabu Moisin ana jatu yuikin:
—Nukun xenipabun mekenika Dios Jehován ja mai pakea yunukin matu ibuwamaxanai anu jikitan na jancha en matu yusiain jadixun Jehován yunuti inun jawen nemati jancha matun jiwea jidabiwen man chibankin akubainxanunbun en matu yuiiai ea ninkakanwen. ²Jene kexa betsauidixun yuda betsa betsapa xukua tibibun mae jatu mebin man jatube detenamekubainxanaii. Januxun jatun yushibubu kenwanmisbu yamawakin keyukubainxankanwen, mati keyatapa anu inun mati tenanman anu inun ji tupan namaxun jabun januxun kenwanmisbudan. ³Januxun jawen kenwanti chi tapu tekekin keyukin inun, jawen kenwanti mishki nichinibu dudukin keyukin inun, chibu nichinibu januxun kenwanmisbu kua keyukin inun, jatun yushibubu dami wanixun kenwanmisbu yamawakin keyuxankanwen. Ja dami uinkin jatun yushibu shinanmisbu dasibi tede akin keyukubainxankanwen, ja jatun yushibu dami jau tsuan ana shinanyamaxanunbunan.

⁴“Jaska jatun yushibubu kenwanmisbu keska chibankin nukun mekenika Dios Jehová ja itsa watan kenwanyamaxankanwen. ⁵Jene kexa betsaudi matunabu xukuabu tibitun mai pakea ibuwaimabun jadatuda mae Jehová ja mae katua janu jaki nukuti tadi jiwe jawen kena janua kaian anu kaxun kenwankin matun mekenika benimawakin man kenwankubaintidubuki. ⁶Ja Jehová benimawati inabu menukin keyuti inun, diezmo inanti inun, jamapai medabenanti inun, jaki tanai bebunkidi min yubakaima inankuinti inun, matun shinanen besti inankuinti inun, jabu dukun ina awa bake bene inun chaxuwan kaiainbu ja jiwe anu jadi dasibi jatu inankin bupaxankanwen. ⁷Jaska man daya chakayamakubainai yunu matu inanshina shinankin Jehová bebunxun ichaxun matunabubetan besti pi benimakin uinmakubainxankanwen, Jehová Diosun matu duawakubainshinawen taexunan.

⁸Natian jaska nuku tibitun shinankin jaska nun bechipaiai nun akubainaibu keska ukedi puketan na man ikai keskayamaxankanwen. ⁹Chanimajaida ja mae anu man unanuma jiwekubainxanai anu Jehová matu inanxanai anu man jikidiamaki. ¹⁰Jakia Jene Jordán ma puketan janu Jehová matu ibuwaxuni anu jikitushitan janua matuki sinataibu Jehová jatu matu nemaxunaya jawama dateama man unanuma jiwekubainxanai”, jatu watan.

Jehová jancha ikunwankin jenetimakiaki, na janchadan

³²januxun Moisin ana jatu yuikin:

“Jaska en matu yusinkin yunukubidanai akubainkin jenetaskayamaxankanwen, jancha betsa tede akama inun jancha betsa chichikin betsa wamadan.

13 ¹Matunabu anua jaska idiamabia bebunkidi unantan matuki chanitidubu inun namakin uintan matu yuitidubu taxnitan ²jaska idiamabia bebunkidi matu yuishina ikaya ana matu yuikin: ‘Yushibubu man unandiamabia ja chibankin ichaxun duawakin kenwanankanwen’, akin matu yuibiabu ³ninkakin ikunwanyamakubainxankanwen. Jakia matun jiwea dasibiwen inun matun shinan dasibiwen man Jehová bechipaiai matu unankatsis ixanikiki. Jaskaya ja juni nematan chibanyamaxankanwen. ⁴Jakia matun mekenika Jehová besti chibankin kenwain jaki dasia jiwexun jawen jui ninkakin jawen yunuti inun jawen nemati akubainkin dayaxunkin duawakubainxankanwen, yusinan betsa betsapabu ninkamadan. ⁵Egipto anu matun ibubu ichakawakin jatu dayadu esclavo wakubainaibun janua matun mekenika Jehová jawen kushipawen matun ibubu paxawani jakimayamakubainxankanwen. Na junibun jatun yushin betsa matu chibanmakatsi ikin Jehová matu dananmakin jawen jancha matu ninkamamakin Jehová jancha

chibain man jawen pei jiwebiaken ja junibun jaska idiamabia matu yuitidubu inun namawen uintan matu unanmatidubu jatu detekin tenanxankanwen. Jaska wakin chakabu matu anua man bextetidubuki”, jatu watan.

**Ikunwanbuman beya jau ayamaxanunbun
jatu yusinikiaki, na janchadan**

18 ⁹Moisin ana jatu yuikin: “Ukedi maiwan pakea matun mekenika Dios Jehován matu ibu wamaxanai anu ibuwai jikitanan, nawa betsa betsapabun jabun jamapai beya atimapa chakabujaida jayabuki. Jatu uintan jatu mawayamaxankanwen. ¹⁰⁻¹¹Jabunan, yushibu chakabubu daewakatsi ikin jatun bake mishtinbu inankin menu keyuxunmisbu inun, yushibu jatu yukaxunikabu inun, juni mukaya mesebu inun, nai anu bishi dua unanikabu inun, yushinbe janchanikabu inun, yushinwen xun itiabu inun, yudabu mawabube janchanikabu matu dapi jiwebaunxankanikiki. Jaska tibi jatuna tapinkin mawayamaxankanwen. ¹²Tsuabunda jaska waibu danankin Jehován bechিপaitidumajaidaki. Jaska nawabun beya chakabujaida jayabuwen taexun matu bebuxunkainkin matun mekenika Dios Jehován jawen kushipawen matu jatu nichinxunkubainxanikiki. ¹³Jehová Diosun matu uianyan jawen jancha jawa kaneama pepakubainxankanwen. ¹⁴Nawa betsa betsapa man jatu nichinxanaibun jadixun jatun mukayabun jaska inunbadiai jatu yusiainbu ikunwanmisbuki. Jawada taxnixanai bebunkidi yuimisbu jayabudiki. Jamen matudan, matun mekenika Jehová Diosun jabun amisbu keska matu nemamiswen taea jatu chibain jaskayamakubainxankanwen.

Diosun jancha yuixunika betsa taxnixanikiaki, na janchadan

¹⁵Matun mekenika Dios Jehován jawen jancha yuixunika betsa ea keska katutan matunabu anua matu taxnimaxunxanikiki. Diosun matu jaska waxunaya jawen jancha ninkakubainxankanwen. ¹⁶Mati Horeb anu ichaxun Jehován jui kushipa ana ninkakatsi ikama ea yukai eska janchai: ‘Jhován jui nun ana ninkakatsi ikamaki. Jawen chi jede kushipa tuenai nun ana uinkatsi ikamadiki, mawakatsi ikamadan’, akin jaska matun ibubun ea yukanibuki. ¹⁷Jatun jancha Jehován ninkatan ea yuikin: ‘Jaska shinankin yuiaibudan, peki. ¹⁸Jatu anua en jancha ea yuixunika mia keskadi katuxun en taxnimaxanaii. Kushipa wakin jaska en yunua jatun ea jabu yuixunkubainxanikiki. ¹⁹Jamen en kenawen janchakin ea jatu yuixunai tsuabunda jawen jancha ninkama ikubainaibu eanan, en jatu kupixanaii. ²⁰Jakia tsuabuda en kenawen janchabiakin jawada en ja yuiama jawen shinanen besti matu yuiaibu inun yushin betsan kenawen

janchakin matu yuidiaibu jatu ninkama tenanxankanwen', akin Jehován ea yuiniki. ²¹Jaska en matu yuiaya matun jointi medan shinankin: "Tsuanda Jehován jancha yuiaidan, ¿jaskatan nun unantidumen?" man itiduki. Matu yuinun ea ninkakanwen. ²²Jhován kenawen janchakin matu yuibiabu jaska yuiái jawa kaianmaken Jehován jatu yunuamaki. Jakia kanekin jatu kenwanmanun ika jatun shinanen besti matu yuiaibu jatun jancha ninkama jatuki dateyamakubainxankanwen", akin jawenabu Moisin yusinikiaki.

Tsuanda jawada uianmabia chanichakai nematikiaki, na janchadan

19 ¹⁵Xanen ibu bebunxun yuda betsaki sinatakin kunyan akin xanen ibu yuikin:

"Natunan, ma chakabuwaxuki", akin bestichaitun jaska jawada jakidi chakabu yuibiaya xanen ibubun jau ninkayamanunbunwen. Jakia dabetun kasmai, dabe inun bestitun jabias janchawen chitekin yuiaibu ninkaxun unanti watan xanen ibubun kupitidubuki.

¹⁶"Jaska inun, juni betsa chakabu yuda betsaki sinatakin jawa meai uianmabia jaki kayai kunyan ikaya ¹⁷ja dabe betsa jaki kayanun betsan jawa meamawen taea ja idabeaya Jehován jatu ninkaya jatu iyuxun jawenabu Diosbe janchaxunikabu inun xanenibun jawada chakabu inun pepabu unanti wanikabu bebunxun ja dabe nichintan Jehován jatu ninkaya ¹⁸unanti wanikabun jatu yuka chakayamakin ja jaki chanichakai ja kunyan ixu chani unantan ¹⁹⁻²¹jabias kupiti yuda betsaki chanichakakin nuitapawaxunwen taexun xanen ibubun jau ja juni chakabun jaska shinanxu keska jawa jawen nuiamajaida jau kupikubainxanunbunwen. Jawen jiwea benumakinan, kechaish akin xeta paskediakinan, jawen bedu tsekadiakinan, jawen tae kasmai jawen meken mextediakinan, ja chanichakaibu matun xanenibun jatu kupiaibu ninkatan jawen datei jatun shinan chakabu bextekekubainxankanikiki. Jatu jaska wakin matu anua ja chakabu man yamawakubainxanaii", akin Moisin jatu yusinikiaki.

Moisés mawanikiaki, na janchadan

34 ¹Jawenabu yusinkin keyutan Moab nawabun maiwan panpa anua kai Mati Nebo anu mapekei ana mati kubudu betsa jawen kena Pisgá mamaki nixun jabias besusi Jericó uian anudan, januxun Jehován Moisés uinmakin jatixun Galaad enabu inun Danen enabun jatun mai pakebukuan kesua ixanai uinmakin ²inun janu Neftalín enabu jatun mai pakea anu jiwebaunxanaibu inun, janu Efraín enabu inun, Manasésin enabu jiwebaunxanaibu anu inun, badi jikiaikidi Ianenwan

Mediterráneo kexa kesua anu jatixun Judán enabu jiwebaunxanaibu uinmakin ³ inun napanpa mai tsusin jawen kena Négueb anu inun, Jene Jordán kexa panpa inun, Jericó mae napanpa ewapa anu janu paniwan mapubauna anu kesutani mae pishta jawen kena Sóar kesua uinmakin keyutan ⁴ Jehován Moisés yuikin:

“Ja maiwan jidabidan, min xenipabu Abraham inun Isaac inun Jacob jabu tibi yubakin: ‘Ja maiwan pakea matunabu pakubainaibu en jatu ibuwamaxanaai’, akin ja dabe inun besti en jatu yubaniki. Ja maiwan pakea min beduwen min uinun en mia uinmai. Jakia ukedi pukebaini min katidumaki”, akaya

⁵ jabiaskadi Jehován bebunkidi yuimadan, Jehován tsuma Moisés mawaken ⁶ Moab nawabun maiwan pakea anu Bet-peor besusi napaku anu jawen yuda Jehová Diosun maiwanikiaki. Mawa janida jawen yuda Jehován maiwanidan, na jabiatian tsuan unanmakiaki. ⁷ 120 año jayabia jawen bedu inun jawen yuda babuama Moisés mawanikiaki.

⁸ Ma debua unantan Moab nawabun maiwan panpa anu Israelin enabun Moisés manui shinain kaxai 30 día kaxakubaini nesenibukiaki. ⁹ Januxun bebunkidi Josué katukin jawen meken dabewen Moisin mamepixon jawen unanepati kushipa Moisin Josué yunuimawen taexun jaska Jehován Moisés yunumaima keska wakín Josué jancha Israelin enabun jadi ninkakin taewabainibukiaki.

¹⁰ Moisés keska Diosun jancha yuixunika betsa Israelin enabu anua tsua jaska keska jayama inibukiaki, jaska jabe beisinain janchapauni keskadan. ¹¹ Jatu eska waxunidan, Egipto anuxun jatun xanen ibu Faraón inun jawen xanen ibu bexmasbu inun jawenabu dasibi kupikin jawen dateti unanmati dami Moisin jatu axuni inun, ¹² jaska Diosun kushipa inun jawen mesejaidawati dami tsuan atiduma jatu waxuain Israelin enabu dasibibun uinkubainibu tsuan jaska keska wakín Moisés binutidub umajaidakiaki.